


CELEBRACIÓN EN OS COTOS

29-30 de novembro do 2025

I DE ADVENTO



NON MÁIS
VIOLENCIA
DE XÉNERO



Os COTOS COA IGUALDADE VERDADEIRA DAS PERSOAS,
COS POBOS QUE SOFREN INXUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA,
E SEMPRE SEMENTANDO PAZ

NADAL

4ª SEMANA DO ADVENTO

3ª SEMANA DO ADVENTO

2ª SEMANA DO ADVENTO

1ª SEMANA DO ADVENTO



1.- ENCONTRO DA COMUNIDADE

(tod@s de pé)

@ monitor/a está na sé

SAÚDO DE BENVIDA



nº 38

Que veña Deus á nosa terra

Celebrante:

Benvidos sexamos todos a esta celebración. Reunímonos para compartir en comunidade a nosa fe no nome do Pai, do Fillo e do Espírito Santo.

A nosa celebración de hoxe comeza coa expresión dun desexo: “*Que veña Deus á nosa terra*”.

Comezamos o tempo do Advento, que é un tempo para prepararnos para o encontro con Deus.

Este ano vai acompañarnos este taboleiro no que iremos amosando que queremos facer o camiño que nos leva do advento ao Nadal. Cada unha das vindeiras catro semanas iremos superando etapas para chegar ao alto, ao encontro con Xesús.

O advento é un camiñar de igrexa coa esperanza de chegar a Xesús feito neno. (alguén arrinca do taboleiro a palabra “advento”).

ACENDIDO DA COROA DO ADVENTO

Monitor/a: *A coroa do advento vai marcar nas vindeiras semanas o ritmo do noso agardar ao Señor. Pouco a pouco imos ir camiñando cara a luz do encontro con Deus e cos demais.*

CANTO 🎵 *Que **veña a luz** ...*

Alguén se achega á coroa do advento

Hoxe queremos luz, a luz dos que se esforzan e están atentos á hora de facer comunidade nos Cotos, a luz dos que queren medrar á hora de ser unha familia, a luz dos que se poñen en pé á hora de botar unha man na casa, na escola, na catequese, no traballo, nas celebracións do domingo, e en tantas e tantas cousas.

E acéndese unha das velas da coroa, mentres se canta

CANTO 🎵 *Que **medre a luz** ...*

ORACIÓN PROPIA DO DÍA

Celebrante: *Rematamos esta primeira parte da celebración presentando a Deus as nosas preocupacións e hoxe pedimos dun xeito especial polas mulleres vítimas da violencia de xénero e polos pobos que non van ter un bo Nadal.*

(silenzo)

Celebrante:

Deus, noso Pai, concédenos a todos nós, a vontade de camiñar ao encontro do Xesús, que está para vir, para que merezamos ser chamados a entrar no teu Reino. Pedímoscho por Xesucristo que vive e reina por sempre eternamente. Amén

2.- PROCLAMACIÓN DA PALABRA DE DEUS

(sentad@s) a palabra de Deus proclámase dende o ambón

Celebrante: *Hoxe estreamos o leccionario que nos vai acompañar todas as semanas durante un ano. Nel imos atoparnos cun Deus que se nos achega e nos fala ao oído e ao corazón. A súa Palabra precisa de que esteamos sempre atentos.*

Na primeira lectura que hoxe imos proclamar se di: “é hora de espertar”, polo tanto é tempo de poñernos en camiño para chegar ao alto co Xesús feito NADAL.

No evanxeo Xesús di: “estade preparados”, polo tanto queremos facer camiño. Escoitémolos nós tamén.

*No Leccionario I A páx 3 **Rom 13, 11-14** LECTURA*

PROCLAMACIÓN DA PALABRA RECOLLIDA NA CARTA DE SAN PAULO AOS ROMANOS

Irmáns e irmás:

Sabendo o intre no que vivimos, xa é hora de que espertedes do sono, pois agora a salvación xa está mais cerca de nós que cando empezamos a crer. A noite vai andada, e o día está a chegar: rexeitemos as obras das tebras e vistamos as armas da luz. Como en pleno día camiñemos decentemente, nada de lupanadas nin libertinaxe, nada de liortas nin envexas. En lugar diso vestídevos do Señor Xesús Cristo.

Palabra do Señor

🎵 n° 7 *Andarei na presenza do Señor* **SALMO**

(en pé) *No Leccio I* A páx 5 **Mt 24, 37-44** **EVANXEO**

PROCLAMACIÓN DO SANTO EVANXEO SEGUNDO LUCAS

Daquela díxolles Xesús aos seus discípulos:

Coma nos tempos de Noé, así pasará cando veña o Fillo do Home. Antes do diluvio comían, bebían e casaban ata o día que Noé entrou na arca; e de nada se decataron ata que veu o diluvio, e os enguliu a todos. O mesmo pasará cando veña o Fillo do Home. Entón estarán dous homes no agro; levarán a un e deixarán ao outro. Estarán dúas mulleres moendo no muíño, levarán unha e deixarán a outra.

Vixiade, porque non sabedes nada do día no que virá o voso Señor. Entendédeo ben: se soubese o dono da casa a que hora vai chegar o ladrón, estaría á espreita e non permitiría que lle asaltasen a casa. Así tamén: estade vós preparados, porque na hora menos pensada preséntase o Fillo do Home.

Palabra do Señor

(sentad@s) gardamos uns instantes de silencio para acoller a palabra no corazón

Este camiño de advento que hoxe iniciamos convidanos a estar atentos, poñendo atención para nos quedarmos durmidos na vida.

(alguén se achega e retira do taboleiro o cartel que di 1ª semana do advento)

ESPERTA

NADAL

4ª SEMANA DO ADVENTO

3ª SEMANA DO ADVENTO

2ª SEMANA DO ADVENTO



É camiño ao Nadal “**ESPERTA**”

Coa nosa vida temos que estar atentos para ofrecela alí onde se necesita. Necesitamos espertar e camiñar coa cabeza ben ergueita. Quizais foron e son moitas as cousas que nos fan desanimarnos pois non están sendo poucos os atrancos polos que pasa a nosa vida. Facer crible o advento é descubrir que no camiño contamos con achegarnos a Xesús, porque a pesares dos pesares, El chegará e se achegará facéndose NADAL. E chega en cada muller e home que o fai ben: na familia e na casa, cos veciños e na parroquia, coa natureza coidándoa, coa igrexa en Os Cotos, ... Aquí teremos que estar espertos.

Estamos espertos, vixiantes e atentos cando non calamos a violencia de xénero.

Estamos espertos, vixiantes e atentos cando nos preocupa o rural, e cando poñemos medios para reciclar, reutilizar e reducir o consumo.

Estamos espertos, vixiantes e atentos cando poñemos medios para que haxa catequese de nenos, mozos, pais de bautismo, e parellas que queren casar.

Estamos espertos, vixiantes e atentos cando nos esforzamos por participar da fe, xa sexa nas eucaristías ou nas celebracións da palabra.

Estamos espertos, vixiantes e atentos agora que compartimos en comunidade camiño do Nadal.

PROFESIÓN DA FE

***Celebrante** Neste encontro parroquial, sabendo que Ti, Señor, es o Deus que ven ao noso encontro, queremos hoxe facelo mellor para camiñar cara o Nadal estando espertos, atentos e vixiantes a canto pasa ao noso arredor. Dicimos:*

*♪ **Creo, Señor, pero aumenta a miña fe***

Monitor/a:

Cremos en Deus, Pai e Nai

que nos enche do seu amor cando quere que o seu Fillo sexa a luz da nosa vida?

Creo, Señor, pero aumenta a miña fe

Cremos en Xesús Cristo,

que se achega a todos nós convidándonos a atender aos demais no camiño da tenrura?

Creo, Señor, pero aumenta a miña fe

Cremos no Espírito Santo,

que alenta a espertar, abrir os ollos e camiñar acollendo a quen todo o mundo deixa de lado por pensar, vivir ou crer diferente?

Creo, Señor, pero aumenta a miña fe

Cremos na Igrexa,

comunidade que queremos facer nestas semanas o camiño que nos leva do advento ao Nadal?

Creo, Señor, pero aumenta a miña fe

ORACIÓN UNIVERSAL

Celebrante: Oremos ao Señor, noso Deus, quen espera nel non queda defraudado. Oremos dicindo:

Queremos estar atentos, Señor

Monitor/a

- ✓ Por nós e por quen comparte a nosa esperanza, para que cando o Señor veña, atope nos nosos camiños fogar acolledor. Oremos
- ✓ Polos gobernos: para que procuren o ben común, defendan os dereitos de toda a xente, e axuden a erguer as vidas máis esquecidas. Oremos
- ✓ Polas xentes que teñen mermadas as condicións de dignidade da súa vida, para que cheguen a atopar á súa beira a man do Señor que se achega a todos. Oremos
- ✓ Polas nosas comunidades parroquiais, para que camiñemos cara o Nadal coas mans abertas da paz. Oremos
- ✓ Polas persoas que se cren que o único que importa é o seu, e pechan as mans cando fai falla un compartir solidario. Oremos

Celebrante: Amósanos, Pai, a túa misericordia e dános a túa salvación en Cristo, dando unha man para facer o camiño que vai do advento ao Nadal con El que vive e reina por sempre eternamente. Amén

3.- OS SIGNOS DA COMUNIÓN CON DEUS E COA COMUNIDADE

NOSO PAI

Celebrante: O advento dinos que Deus está cerca, Deus está na nai que espera un fillo e está no pai que dá un colo; está na muller que espera paz e non violencia; está en quen sementa paz; está en quen coida de quen non se vale por si só. Deus está en ti, en min, en nós, e xuntos queremos camiñar ao seu encontro. Recemos confiados:

NOSO PAI ...



SIGNO DA PAZ

Celebrante: As nosas mans abertas falan de estar espertos e atentos, falan de ofrecer o mellor aos demais, falan de estar vixiantes coas vidas esquecidas. Que o Deus da paz nos alente a facer o camiño ao Nadal, e coma irmáns deámonos a paz.



nº 38

Que medre a paz na nosa terra

COMUÑÓN

Celebrante: *Esta mesa de parroquia é a mesa do compartir todo o que Deus nos agasalla, é o sabernos vixiantes e atentos para facerlle un sitio ao que nos nace no Nadal. Ditosos nós por sermos invitados a compartir coma irmáns este pan do Señor.*

Señor, eu non son merecente de que entres no meu fogar, mais unha palabra túa abonda para me salvar

🎵 *Que medre a paz (ben, amor, fe, ...)*

4.- AVISOS E DESPEDIDA

ORACIÓN FINAL

Celebrante:

Señor, Noso Pai,
queremos que frutifique en nós esta celebración
pois Ti vasnos ensinando xa nesta vida
a descubrimos o valor dos bens eternos
e a poñermos neles o noso corazón.

Pedímoscho a Ti que vives e reinas
por sempre eternamente. Amén

A nosa celebración de advento é vivir a esperanza de atopar luz no encontro con Xesús feito Nadal.

A nosa celebración de advento é compartir a fe cos nosos irmáns facendo camiño.

A nosa celebración ten que ser tamén vivir como verdadeiros cristiáns no medio da nosa sociedade. Por iso cada quen pode levar a parte de hoxe, para pouco a pouco completar a árbore de Nadal deste ano. Levemos a peza de hoxe e vaiámolas pegando cada unha das vindeiras semanas

(Repartimos esta parte do camiño para levalo para a casa)



ESPERTA

**“Estade vós preparados,
porque na hora menos pensada preséntase o NADAL”**

Palabras do evanxeo de hoxe

Avísase das misas (ver folla do mes)

***Que teñamos un bo día, unha boa semana
e o Señor nos bendiga,† nos garde de todo mal
e nos leve ao seu fogar de vida eterna. Amén
Podémonos ir en paz. Dámoslle grazas a Deus***